

Date – 06/10/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Election Commission of India chuan Dampa bial by-election neih hun tur atan November ni 11 a ruat a, model code of conduct hman nghal a ni ang
2. Chief Minister Pu Lalduhoma kaihhruiin vawiin khan Aizawlah SASCI hnuaiia Department hrang hrang kaltlanga hmalakna kalpui dan thirletna hun hman a ni.
3. Mizoram State Legal Services Authority buatsaih Legal Aid Clinic chuThenzawl, Chhiahtlang leh Chhingchhip ah vawiin khan Justice Nelson Sailo chuan a hawng.
4. World Para-Athletics Championship neih zawh taka India infiammiten medal 22 lai an la thei chu a lawmpui thu Prime Minister Narendra Modia chuan a sawi



DAMPA BY ELECTION

Election Commission of India chuan Dampa bial by-election neih hun tur atan November ni 11 a ruat a, model code of conduct hman nghal a ni ang.

Dampa bialtu MLA Pu Lalrintluanga Sailo a thih avanga by-election neih hun tur hi Election Commission of India chuan vawiin tlai dar 4 khan puangin hemi rual hian state dang pasarih-a by election neih hun tur bakah Bihar inthlanpui neih hun tur a puang a ni.

State Election Commissioner Dr Lalrozama chuan nimin tlai dar 5 khan Dampa Bial MLA By-Election neih tur chungchangah hian thuthar thehdarhtute a kawm a; by-election atan hian October 21thleng chuh tumte tan hming pekluh theih a nih thu leh inhnukdawk duh tan October 24 thleng hun hawn a nih thu a sawi a. Vote tla ni Nov ni 14 ah chhiar a ni dawn a ni.

Inthlan kaihnawihah tluang taka thil kalpui a nih theih nan mipui, tlawmngai pawl leh political party-te tawiamna nengin SEC chuantoll free number 1950-ah mipuiin thil dik lo nia an hriatte report theih a nih thu a sawi bawk.

Dampa bial inthlan that hun tur puan a nih hma hian Political party te chuan an candidate tur an puang fel vek tawh a, tun dinhmunah kil li atanga inbeih a ni dawn a, sawrkar lai ZPM party chuan an party candidate atan Pu Vanlalsailova an ruat a, MNF Party chuan an party candidate atan Dr R. Lalthangliana an ruat a, Congress Party chuan an party candidate atan Pu John Rotluangliana ruatin BJP chuan an party candidate atan Pu Lalhmingthanga an ruat bawk a ni.

Dampa bialah hian Vote nei zawng zawng Mipa 10605 leh hmeichhia 10185 an vaiin 20790 an ni a, Draft Roll atanga vote nei punna ni 385 a ni.

Final Roll tlangzarh takah hian Polling Station 41 awmin, Polling Station Pakhat zelah Elector 507 awm ang an ni a. Voter tlemna ber hi Zopui Polling Station niin Voter 30 an awm a, Voter tamna ber hi Silsury -I Polling Station a ni a, Voter 1103 an awm a. Service Voter hi 115 a awm bawk a ni.

<><><>

ELECTION

Bihar Assembly inthlan hi thawh hnihin November ni 6 leh ni 11 ah neih a ni dawn. Chief Election Commissioner Gyanesh Kumar chuan wawiiin tlai khan New Delhi-ah Bihar Assembly inthlan hun tur hi puangin vote tla te hi November ni 14 ah chhiar a ni ang a ti a. Bihar ah hian Assembly seat 243 a awm a. Inthlan thawhkhatna chungchanga hriattirna hi tun thla October ni 10 ah leh thawhhnihna hi October ni 13 ah tihchhuah a ni ang a. Inthlan thawhkhatna chuh tumte tan tun thla ni 17 thleng hming thehluh theih a ni a, inthlan thawhhnihna hi tun thla ni 20 thleng hun hawn a ni bawk ang.

Vote tla te hi November ni 14 ah chhiar a ni ang a, November ni 22 ah inthlan kaihnawih zawng zawng zawhfel a ni ang a ti bawk. Bihar inthlan rual hian November ni 11 ah Assembly byelection neih a ni nghal dawn a. Heng byelection neihna turte hi Jammu And Kashmir ah seat 2, Rajasthan, Jharkhand, Telangana, Punjab, Mizoram leh Odisha ah seat khat theuh an ni.

<><><>

CM SASCI

Chief Minister Pu Lalduhoma kaihhruaiin wawiiin khan Aizawlah Special Assistance to States for Capital Investment (SASCI) hnuaiia Department hrang hrang kaltlanga hmalakna kalpui dan thlirletna hun hman a ni a.

Thusawiiin, Chief Minister chuan SASCI chu Department hrang hrang kaltlanga hmasawna hna thawhna tur a nih angin, hmalaknate a hun taka zawh fel thin a nih theih nan ngaih pawimawh a tul thu a sawi a. Department thenkhata thawktute inthlahdahnain SASCI kaltlanga hna tha taka thawktu Department dangte a tih khawtlai phah theih avangin thawktute inthlahdah lo turin a chah a. SASCI

hnuaiia hnate tha taka thawhin a kum leh a ruahmanna kalpui dan tur nasa taka a hirl lawk thu Chief Minister chuan sawiin, department hotute chu a hun taka hna zo fel hman turin a chah a. A tul dan azirin Department hrang hranga thawktute pawh indawrtawn zung zung thin tur leh an hnuaiia thawktute uluk taka vila enpui thin turin a chah bawk a ni.

Meeting ah hian Kum 2024-25 chhunga Project kal lai, Expenditure Sanction la awm lo, PWD hnuaiia Project 3, Agriculture & Farmers Welfare Department hnuaiia Project 3, Disaster Management & Rehabilitation hnuaiia Project 2, UD&PA hnuaiia Project 1, Food Civil Supplies & Consumer Affairs, Tourism, Land Resources & Soil Conservation leh Irrigation & Water Resources Department hnuaiia project 1 theuhte chu thlirlet a ni a. PWD hnuaiia Working Women Hostel sak hna chak zawka bawhzui dan tur leh PM Ekta Mall (Unity Mall) sak hna sawt zawka kalpui dan turte sawi ho a ni bawk.

<><><>

PARTY PR

MNF President Pu Zoramthanga chuan Forest Conservation (Amendment) Act chu a that leh a chhiat an sawi loa, thuneihna vawnhim chu a tul an ti ber tih a sawi.

Vawiin khan Mizo Hnam Rûn chhung inkhawmah thusawiin, Pu Zoramthanga chuan FCAA chu a tawp thlenga an dodal dawn thu leh Mizo hnam himna kulhbing humhim ngam sorkar an siam leh dawn a ti a, he dan hman duh loh thu hi pass kher lo mah se, Peace Accord (Art. 371 G) hian a humhim sa a, hei hi a chian lehzual nana lo in ralrin nan MNF chuan an duhlohna thu an pass thu leh central-ah an thawnthlak nghal thu a sawi.

ZPM sorkar chuan a dil pawh an dil hmain, pawnfen hmalam hlimesang sa leh dawih aw chhuahin a engamah hmain FCAA chu an pawm a ti a; hnam pasalthate thisena leichhuah, mipuiin an tawrh chhuah, Mizo hnam himna leh Mizoram leilung chunga thu neihna chabi chu central hnenah ZPM sorkar chuan an hlan tih sawiin, Mizo hnam himna kulhbing humhim ngam sorkar an siam leh dawn thu leh FCAA chu a tawp thlenga an dodal dawn thu a sawi a ni.

<><><>

PARTY PR 2

Adviser to Chief Minister (Political) Pu Lalmuanpuia Punte chuan skill development lama thalaite training-na tur course 15 awmna Incubation Centre Tuahzawlah din a ni dawn a ti.

Vawiin khan ZPM chhung inkhawmah thu sawiin, Pu Lalmuanpuia chuan Mizorama Incubation Centre din tur chu India hmarchhaka awm chhun tur a ni a ti a, India ramin Kaladan Multi-Modal Transit Transport Project a buaipui mek hi kum 2026-ah zawh fel an tum thu leh India tana sumdawnna kawngpui leh kawtchhuah ropui tak tur Mizoram kaltlanga siam a ni tur chu Pathian malsawmna a nih thu a sawi a; ZPM sorkar chu Pathianin a hria a, a kaihruai a, opposition-ten nasa takin bei mah se thil tha a ti mawlh mawlh reng niin a sawi bawk.

BJP Mizoram pawhin vawiin khan an party pisaah chhung inkhawm an nei a, BJP state president Dr K Beichhua chuan thu sawiin, India rama Prime Minister Pu Narendra Modi kaihhraina hnuaiyah Social Security-ah nasa takin India ram chu a thang a, hmasawna nasa tak a awm avangin ram dang pawhin nasa takin India ram hi an ngaihsan phah tawh tih a sawi.

Dr K Beichhua chuan PM Scheme hrang hrangte chuan a huap zoin a fûn kim hle a, kum upa leh pianphunga rualbanlote thlengin he social security hian a huam thu leh Mizorama hman ve loh thlengin scheme tam tak a awm thu a sawi a; Mizoram mipuiten BJP chu engvanga hlau tlat nge tih hi an inzawhna lian tak a nih thu a sawi a, BJP hi hlauh tur ni loin ram hmasawna atana thlawp tlat ngai zawk a nih thu a sawi bawk.



LEGAL AID CLINIC

Mizoram State Legal Services Authority Executive Chairman Justice Nelson Sailo, High Court Judge chuan Thenzawl, Chhiahtlang leh Chhingchhip Legal Aid Clinic vawiin khan a hawng.

Justice Nelson Sailo chuan mitinin an chanvo an chan ngei theih nan Legal Aid Clinic chu buatsaih a ni a ti a, mipui mimirin dan leh hrai kaihhnawih thurawn an lak theihna tur leh, harsatna leh mamawhna an neih apianga an pan theih tura hawn a ni, a ti. Puih ngai tupawhin inthlahrung lova engtik hunah pawh Legal Aid Clinic te hi pan thin tur leh khawtlang hruaituten tangkai taka hmang turin a chah a. Para Legal Volunteer ten an vil dawn a, amaherawhchu anmahniah ringawtah inngat mai lovin khawtlang hruaitute ten theihtawp an chhuahpui chuan khaw nuam kan ni ngei ang a ti bawk.

Hawna inkhawmah hian Mizoram SLSA Member Secretary Pu Vincent Lalrokima, chuan thu sawiin, Legal Aid Clinic chu mipuite tan malsawmna a nih ngei an beisei a, tangkaina tam tak a nei dawn a ni a ti a. Mizoram sawrkar hian Mizoram State Legal Services Authority bakah district tinah District Level Services Authority a din a. Eng hawi zawng pawha tanpui ngaite tanpui tura theih tawp chhuah hi an dinchhan a ni tih a sawi. Mipuite tan theihtawp an chhuah a, khawtlang hruaitute nen hian an thawkho vek a ni a tih sawiin, Legal Aid Clinic hi tu tan pawha pan theih a nih thu hre thar theuh turin a sawm a ni.

Justice Nelson Sailo hian heng khaw pathum te hman tangkai atan Silpauline leh Emergency light thahnem tak Village Council te hnenah a hlan a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



TERRITORIAL ARMY

Ruahmanna an lo siam tawh angin vawiin khan Mizoram a a hmasaber atan Territorial Army lakna tur a inbuatsaihna,Pre-Recruitment Rally chu Lunglei Kawmzawla TA Campah tan a ni a,

Lt.Col. Prasant Kakade chuan mizo thalai he hun hmang tur a kal te chungah duhsakna hlan in theihtawp chhuah a, hun remchang an neih chu hmang tangkai turin a fuih. TA nih phung leh a thatna te hrilhin hlawh leh hamthatna tha tak an dawng thei dawn a, hei hi an chhungkua leh khawtlang tan pawh a chhenfakawm thei dawn a ni a ti. Thuawihna leh in sumtheihna a pawimawh a, ruihtheihthil, zu leh damdawi thalo lakah in veng tur a chah in Mizoram leh ram ropui India tan theihtawp chhuah tur a sawmin India ropuina leh himna hi kan zavai a mawhphurhna a ni a ti .

Tun Tumah hian mi 19 an kal a, a duh tan Coaching or Pre Training hi nitin a chhim theih ang a ti a, Mizo thalai leh School thuneitu te pawhin an naupang te helai hmunah hian hruaiin annin Sipai nihphung an hrilhfiyah thei reng tih a sawi. Puan tawh angin Recruitment tak tak hi November thlaah RG stadium mualpuiah neih tur a ruahman a ni



PARA ATHLETICS

World Para-Athletics Championship neih zawh taka India infiammiten medal 22 lai an la thei chu a lawmpui thu Prime Minister Narendra Modia chuan a sawi. Social media kaltlanga he thu hi sawiin Pu Modia chuan rualbanlote tana intihsiakna lian ber World Para Athletcics Championship-a medal 22 zingah hian gold medal 6 an la tih a sawi a. Hei hi India in a la tihthat ber tum a ni a ti. Pu Modia chuan vawiina hlawhtlinna chang infiammite chuan mi tam tak thinsung an hneh dawn a ti a. India aiawha fehchhuak zawng zawngte a lawmpui thu leh an hmabak zelah duhsakna a hlan a. World Para-Athletics Championship Delhi-a nghah a ni chu ram tana inchhuanna tham a ni a ti a. Ram 100 chuang atanga infiammi lo kalte chungah lawmthu a sawi a ni.

